

Ատոով խոցեցիր դու զիս, ես դարի՛յ եմ, երթամ ընդ ո՛ր:

Ժ Ա .

Աչերս երեսես ի վար լօք գանգատ արաւ ի սրտիս.

-Երթամ սիրոյ տէր լինիս, գան հազար չարի ածեն զիս:

Սրտիկս աչերուս ասաց՝ - Կուրանամ թէ ծուռ կու խօսիս.

Ինչ որ աչք չիհանէ, չիխաբեր հազար լեզու զիս:

Ժ Բ .

Լուսին, պարծենաս, ասեն, «լուս կուտամ ես աստընւորիս».

Ահա՛ հողեղէն լուսին ի գրկիս 'ւ երեսն երեսիս:

Թէ չես ատալ այս գերուս, յետ տանեմ ըզփեջ կապայիս.

Վախեմ սիրոյ տէր լինիս, լուս պակաս տաս աստընւորիս:

Ժ Գ .

Կարմիր ու սպիտակ երես, ամ, քանի՛ զիմ սիրտս աչըրես.

Կ'երթաս ի թուխ ամպն ի ներս, ամպուզով կ'անես զիս կ'երես,

Կոճկիկդ ալ արծակ այնես ու ճերմակ ծոցըդ ցուցանես,

Անկի զիս մահրուն հանես. թողի գփողուն ձայնըն չիլըսես:

Ժ Դ .

Ի՛նչ անեմ կամ ի՛նչ լինամ երբ նայիմ որ դուն չերեւիս.

Սրտիս ալ ո՛նց տամ համբեր՝ երբ լեզուովդ ի յիս չիխօսիս:

Կուլամ նայ կուտաս ճուղապ՝ «Սապռ արա՛, սիրուս հասանիս.

Սեւ սապռ ամ, քանի՛ անեմ, եփեցա՛ւ ճիկարս ի փորիս:

Ժ Ե .

Տեսայ իմ հոգուս հոգին որ կ'երթար հետ մեկի մըն ալ.

Ձեռկունքն ի վերան ձըգել ու գանգատ կ'աներ մեկի մ'ալ.

Սրտիկըս ի յիս ասաց թէ անոր թարկըն պիտի տալ.

Այն սերն որ ճորով լինի, հետ անոր խաղալն է մուհալ:

Ժ Զ .

Մեջկունքդ է բարակ 'ւ երկար, ծըծերուդ մեջըն կայ խայտալ.

Շատ մարդ է մեռել սիրուդ, կու վախեմ թէ մեռնիմ ես ալ.

Մեռնիլ պիտի, չիկայ ճար. զայս հոգեկս ի քեզ պիտի տալ: